

# Kargua hartu eta berehala, lehen arazoei egin behar izan die aurre Giuliano Amatok

Legebiltzarrak eta Senatuak bihar baietsiko dute Italiako Gobernu berria

Erredakzioa / Donostia

Giuliano Amato Kontseiluko presidente izendatu zuen atzo Carlo Azeglio Ciampi Italiako lehendakariak. Bigarren Mundu Gerra amaitu geroz-

tik Italiako 58. Gobernuaren ardura hartzea, haatik, bihar izango da, Legebiltzarrak eta Senatuak baietsi ostean. Amatorek helburu nagusia egoera ekonomiko nahiko on bat kudeatzea izango da, ezker-zentroko

koalizioak aukera bat izan dezan 2001eko hauteskunde legislatiboak irabazteko. Gobernu berriaren osaketarekin lehen arazo bat izan du, ordea, ministro ekologista batek bere karguari uko egin baitio.

GIULIANO AMATO izango da Italiak Bigarren Mundu Gerra amaitu geroztik ezagutuko duen 58. Gobernu ardura-duna, zeina 1992-1994. urteen bitartean Kontseiluko presidente izan baitzen. Carlo Azeglio Ciampi Errepublikako presidentek izendatu zuen atzo kargu horretarako, Amatok bere Gobernu aurkeztu ostean. Haatik, gobernuburu kargutan bihar da benetan izango, Italiako diputatu eta senadoreek izendapen hau onartu eta gero.

Giuliano Amatok aurrekoan baino egoera hobean hartuko du gobernuburu kargua, ekonomiaren aldetik behintzat. Politika kontuan du erronka zaila izango, zeren eta gidatuko duen ezker-zentroko koalizioaren alderat iritzi txarra nagusi baita, antza, Italiako gizartean. Horrela azaldu zen behintzat iragan apirilaren 16an egin ziren eskualdeetako hauteskunde emaitzetan, Gobernu koalizioak porrot handia jasan baitzuen Silvio Berlusconi buru duen eskuinteko oposizioaren mesedetan. Kluk egite honen ondorioz zuen Massimo D'Alema gobernuburuak bere kargua uztea erabaki.

## Ekologistak ministro karguari uko egin dio

Ciampi presidenteari atzo aurkeztutako Gobernuan 24 ministroren zerrenda agertu zion Amatok, hots D'Alema-ren gobernuan baino bat gu-



Giuliano Amato eta Carlo Azeglio Ciampi, atzo, topa egiten, Quirinale jauregian.

txiako. Hortaz, nabari geratu da gobernuakideak murrizteko asmoa ez duela bete Amatok, seguruenik bere Gobernu sustatuko duen gehiengo parlamentarioko osagai guztiei ordezkari bat ziurtatu beharrean egon baita.

Alta bada, lehen arazo bati aurre egin beharrean izan da Amato, Berdeak alderdi ekologistako ordezkari batek uko egin baitio eskainitako Europako Arazoetako ministro karguari. Edo Ronchi Ingurugiro ministro zen D'Alema-ren Gobernuan eta, emandako azalpenaren arabera, ez du ontzat hartu Ministerio hori

ezker-zentro koalizioiko beste alderdi baten esku uztea. Bihar baino lehen, beraz, Amatok konpondu beharko du lehen buruhauste hau.

Politika aditu orok dio pertsonalitate egokiena dela Gobernu koalizio nahiko bihurritsu hau gidatzeko. 1992-1994 bitartean ekonomiaren gaitzaldi bati eta *manu pulite* operazioak sortarazitako egoera politiko larri bati aurre egiten jakin zuen Amatok.

Gaur egun, Italiako ekonomia nahiko sendo da, eta gutxienez BPGan % 2,5eko hazkunde bat behar luke aurtun. Egoera on honetaz

baliatuz, litekeena da Amatok zergen gutxitze bat iragartzea eta neurri honek, jakina, ezker-zentroko koalizioari italiarren oniritzia segurtatuko lioke. Amatok, halaber, erreforma oso garrantzitsu bat bidean ezar lezake, hau da hauteskunde ereduaren erabateko aldaketa, proportzionaltasun osoa bertan behera utzita. Oraingo ereduak alderdi txikiak ordezkariak izatea ziurtatzen badu ere, Gobernu osatzeko gehiengo oso kolokatsuak eragiten ditu eta honek du Italiako agintaren egonkortasun eza ekartzen.

## Maskhadoven errenditzeko asmoaren albiste «zentzugabetzat» jo du Kremlinek

Agintari errusiarrek gogor salatu dute NBEko giza eskubide batzordearen jarrera

Agentziak / Mosku

ERRUSIAKO *Segodnia* egunkariak Aslan Maskhadov Txetxeniako presidentea errenditu egingo dela eta Vladimir Putinen indulto bat jasoko duela zabaldu ostean, Kremlinek eta Inguxetiako presidente Ruslan Auxevek erabat gezurtatu zuten atzo informazio hau.

*Segodnia*-k zioenez, Maskhadovek amore emango luke, Txetxeniak pairatzen duen odol jariora eta bere populuaren genozidioa geldiarazteko. Albiste hau «zentzugabetza» zela adierazi zuen Kremlinek Txetxeniako duen aholkulari berezi Sergei Jastrjembkskik.

Inguxetiako presidente Auxevek zioenez, berriz, —Errusiar eta txetxeniak agintarien artean bitartekari lan bat egiten saiatzen ari da— «errenditze bat aipatzen dutenek ez dute Txetxeniako egoera ezagutzen, ezta txetxeniaren mentalitatea ere; are gutxiago Maskhadoven izakera». Auxevek zehaztu zuen, halaber, Txetxeniako gatazkaren konponbiderako kontaktuak etenda daudela gaur egun, eta aukera gutxi dela berriro egon daitezen epe laburrean. «Damugarri deritzot zinez, baina Putinen inguruan bakearen alde direnek militarrek baino eragin gutxiago daukate», azpimarratu zuen Inguxetiako presidentek.

## Errusiarrek haserre NBErekin

Txetxeniako egoeraz NBE Nazio Batuen Erakundeko giza-eskubideen aldeko batzordeak asteartean egingako kritika eta eskariari gogor erantzun zieten, berriz, agintari politiko errusiarrek. Larrialdi egoerako ministro Sergei Xoiguk adierazi zuenez, «mendebaldeko herrietako zenbait sektorek Errusiaren desegite bat daukate helburu», haren ustez, Txetxeniaren independentzia asmoak sustatzen baitutuzte.

## laburrean

### A R M E N I A

#### Kotxarian presidentea kargugabetzeko prozesua abian

BATASUNA eta Egonkortasuna alderdiek (127 aulkietatik 82) Robert Kotxarian presidentea kargugabetzeko prozesua hasi dute. «Goi traizioa eta krimen larria» leporatzen diote, Vazgen Sarkisian aurreko lehen ministroaren eta beste zazpi lagunen hilketaren ikerketaren berri Parlamentuari ez emateagatik. 87 diputaturen botoa eta Auzitegi Konstitu-

zionalaren baiezkua beharrezkoa da presidentea kargutik kentzeko.

### B O S N I A

■ **Mendebaldeak gustuko ez duen lehen ministro serbiarra aukeratu dute**  
BOSNIAKO lehendakariak hirukoitzak Tihomir Gligoric sozialista hautatu zuen atzo konfederazioko lehen ministro. Mendebaldeak ez du gustuko Gligoric, ez baitu Milorad Dodik Errepublika Serbiarreko gobernuburu moderatuaren sos-

tengurik. Bosniako Ministroen Kontseilua blokeatuta izan da azken sei hilabeteotan.

### T U R K I A

■ **Gaur aukeratu dute presidentea**  
TURKIAKO Parlamentuak Errepublikako presidentea aukeratzeko bozketak hasiko ditu gaur. Litekeena da Ahmet Necdet Sezer lehen bozketan bertan nagusitzea, bost alderdi politiko nagusien sostengua lortu baitu.